

## Evening Dogri (NSD)

29-08-2025

### खबरां

1. प्रधानमंत्री नरेंद्र मोदी ते जपान दी प्रधानमंत्री इशिबा होरें टोक्यो च 15में भारत-जपान सम्मेलन च शिरकत कीती।
2. प्रधानमंत्री नरेंद्र मोदी होरें आखेआ ऐ जे जपान दी तकनीक ते भारत दा हुनर शताब्दी दी तकनीकी क्रांति दी अगुवाई करोग।
3. केंद्री उद्योग ते वाणिज्य मंत्री पीयूष गोयल होरें भारत-अफ्रीका बश्कार रिश्ते मजबूत करने पर जोर पाया तां जे बपार 2030 तोड़ी दोगुणा होई सकै।
4. केंद्री गृह मंत्री अमित शाह होरें गोलाप बोरबोरा होरें गी दूरदर्शी समाजी नेता, स्वतंत्रता सेनानी ते असम दे मुखमंत्री दे तौर पर चेत्ता कीता। गुवाहाटी च उन्दे साल लम्में जनम शताब्दी कार्यक्रमें दी शुरूआत कीती गई।
5. हॉकी दे जादूगर मेजर ध्यानचंद हुंदी जयंती दे मौके राष्ट्री खेड्ड दिवस पूरे देश च मनाया गेआ।

<><><><><><>

### PM-Indo Japan Summit

प्रधानमंत्री नरेंद्र मोदी होरें अज्ज 15में टोक्यो जपान सालाना सम्मेलन च शिरकत कीती जेदे च उन्दे हमरूतबा शिंगेरू इशिबा होर बी मौजूद हियां। सम्मेलन दरान दवें नेताएं दपक्खी रिश्ते दी नजरसानी कीती ते खास रणनीतिक ते वैश्विक सांझेदारी दे दुए चरण बक्खी बदने बारै चर्चा कीती। प्रधानमंत्री होरें आखेआ जे चर्चा उद्देश्यपूर्ण रेही। उनें आखेआ जे भारत-जपान दी सांझेदारी विश्व शांति ते स्थिरता आस्तै जरूरी ऐ।

<><><><><><>

## PM-ECO Forum

प्रधानमंत्री नरेंद्र मोदी होरें आखेआ ऐ जे जपानी तकनीक ते भारी हुनर दा तालमेल इस शताब्दी दी तकनीकी क्रांति गी मजबूत करोग। टोक्यो च भारत-जपान आर्थिक फोरम गी संबोधित करदे होई प्रधानमंत्री मोदी होरें आखेआ जे जपान तकनीक दा उर्जास्रोत ऐ ते भारत हुनर दा जपान म्हेशा गै भारत दे विकास दे सफर च महत्वपूर्ण साथी रेया ऐ। मेट्रो थमां उत्पादन होए जा सेमीकंडक्टर थमां स्टार्ट अप्स, दवें देशें दी सांझेदारी हर क्षेत्र च आपसी विश्वास गी उजागर करदी ऐ। प्रधानमंत्री होरें आखेआ जे भारत नै ए.आई, सेमीकंडक्टर क्वांटम कम्प्यूटिंग, जैव तकनीक ते अंतरिक्ष दे क्षेत्र च नमी ते चुनौतीपूर्ण गैं पुटियां ना। रक्षा ते अंतरिक्ष क्षेत्र दे बाच भारत निजी क्षेत्र आस्तै न्यूक्लियर उर्जा सेक्टर बी खोला'रदा ऐ। उनें जोड़ेआ जे भारत दुनिया च तेजी कन्नै अगो बदने आहली अर्थ बवस्था ऐ ते तौलें गै वैश्विक तौर पर त्री बड्डी अर्थ बवस्था बनी जाग। इस मौके बोलदे होई जपान दे प्रधानमंत्री शिगेरू इशिबा होरें आखेआ जपान दी नमी तकनीक ते भारत दा बिरला हुनर इक दुए गी मजबूती दिंदे ना। उनें लो पाई जे कई जपानी कंपनियां मेक इन इंडिया च अहम भूमिका निभा'रदे ना।

<><><><><><>

## Prez.

राष्ट्रपति द्रौपदी मुर्मू होरें अज्ज सार्वजनिक क्षेत्र दे उद्यमों गी नमी दिल्ली च .. पुरस्कार कन्नै नवाजेआ। कट्ट गी संबोधित करदे होई राष्ट्रपति मुर्मू होरें आखेआ जे सार्वजनिक क्षेत्र उद्यम आजादी थमां गै आर्थिक विकास ते समाजिक समावेश च अहम भूमिका निभा'रदे ना। खजाना केंद्री राज्य मंत्री पंकज चौधरी होरें आखेआ जे सार्वजनिक क्षेत्र दे उद्यम राष्ट्र निर्माण ते वैश्विक स्तर पर अपना मुकाम मजबूत करियै अहम योगदान देआ'रदे ना।

<><><><><><>

## CJI

भारत दे प्रधान न्यायाधीश बी.आर गवई होरें अज्ज सुप्रीम कोर्ट दे 2 नमें नियुक्त न्यायाधीश गी शपथ दोआई। न्यायाधीश आलोक अराधे ते न्यायाधीश विपुल मनुभाई पंचोली होरें सुप्रीम कोर्ट दे न्यायाधीशों दे तौर पर शपथ लेई। हून सुप्रीम कोर्ट कोल अपनी पूरी समर्थ स्थाबै 34 न्यायाधीश होई गए ना।

<><><><><><>

## NIA

राश्ट्री जांच एजेंसी-एनआईए नै मुजफ्फरपुर ए.के 47 राइफल ते अस्ला बरामदगी मामले च मुख् आरोपी गी गिरफ्तार करी लैता ऐ। आरोपी मंजूर खान उर्फ बाबू भाई पर कथित तौर पर आरोप ऐ जे दुएं कन्नै रलिए एहू ए.के 47 राइफल सने दुए बोर हथियार नागालैंड थमां बिहार च तस्कर करदा हा। खान दी गिरफ्तारी कन्नै एनआईए गी भरोसा ऐ जे गैर कनूनी हथियारें दी तस्करी पर नकेल कस्सी जाग।

<><><><><><>

## Goyal India Africa

केंद्री उद्योग ते वाणिज्य मंत्री पीयूष गोयल होरें भारत अफ्रीका बश्कार रिश्ते पर कम्म करने पर जोर पाया जिस करी दपक्खी व्यापार 2030 तोड़ी दोगुणा होई जा। भारती अफ्रीका बपार कन्क्लेव दे 20में संस्करण दे समापन सत्र गी संबोधित करदे होई गोयल होरें आखेआ जे भारत-अफ्रीका बश्कार बपार पूरे तरीके संतुलित ऐ। भारत दा निर्यात 42.7 बिलियन डालर ते आयात 40 बिलियन डालर ऐ। उनें आखेआ जे भारत दा उत्पादक अफ्रीका दी बददी मंगें गी पूरा करने च अहम भूमिका निभाई सकदा ऐ।

<><><><><><>

## Shah-Brahmputra Wing

केंद्री गृह मंत्री अमित शाह होरें गोलाप बोरबरा होरेंगी मदान समाजी नेता, स्वतंत्रता सेनानी दस्सेआ। उनें दस्सेआ जे बोरबोरा असम दे पैहले गैर कांग्रेसी मुख्मंत्री हे जिनें सारें आस्तै कम्म कीता। शाह होरें आखेआ जे उंदा कार्यकाल थोड़ा हा पर उस दरान महत्वपूर्ण ते प्रतिष्ठित संस्थानें दी स्थापना कीती गई। इस मौके बोरबोड़ा हुंदे जीवन पर इक किताब दा विमोचन बी कीता गेआ।

<><><><><><>

## Shah-Guwahati

केंद्री गृह मंत्री अमित शाह होरें अज्ज गुवाहाटी च राजभवन दे नमें बने दे ब्रह्मपुत्र विंग दा उद्घाटन कीता। एहदे अलावा उनें गोलाघाट च राश्ट्री साइबर फारेंसिक प्रयोगशाला दा शुभारम्भ बी कीता ते सशस्त्र बलें आस्तै कई विकास परियोजनाएं दा नींह पत्थर रक्खेआ। गृह मंत्री होरें आखेआ जे केंद्र सरकार देश च अपराध न्याय प्रणाली च फारेंसिक सबूतें दे आधार पर कार्रवाई गी तरजीह देआ रदे न।

## LS-Speaker

लोकसभा स्पीकर ओम बिरला होरें भुवनेश्वर च अनुसूचित जाति ते अनुसूचित जनजाती पार्लिमानी कमेटी दी 2 ध्याड़े दी राश्ट्री सम्मेलन दा शुभारम्भ कीता। सम्मेलन च राज्यसभा दे उपाध्यक्ष हरिवंश, केंद्री मंत्रिण, ओडिशा दे मुख्मन्त्री, कमेटी दे अध्यक्ष ते सदस्यें शिरकत कीती।

<><><><><><>

## Bihar-Rojgar Yojana

बिहार सरकार नै मुख्मन्त्री महिला रोजगार योजना गी मंजूरी देई दिती ऐ। काबिना दी इक बैठक च इसी मंजूरी दिती गेई जेदी अध्यक्षता मुख्मन्त्री नितीश कुमार होरें कीती। इस स्कीम दे तैहत राज्य दे हर परिवार थमां इक महिला गी रोजगार शुरू करने आस्तै माली मदाद दिती जाग। पहली किशत दे तौर पर चनोई दी हर महिला गी 10 ज्हार रपे दिते जाडन जेदे कन्नै ओहू अपनी मर्जी दा रोजगार शुरू करी सकडन। इच्छुक महिलाएं थमां दरखास्तां हासल करने दी प्रक्रिया तौले गै शुरू होगं अगले म्हीने थमां महिलाएं दे खाते च पैसे आना शुरू होई जाडन। इस स्कीम दे तैहत ग्राएं कस्बें, मकामी बजारें ते हातें गी विकसित कीता जाग तां जे महिलाएं तरफा बनाई दी चीजें दी बिक्री होई सकै।

<><><><><><>

## Bihar-CM

बिहार नै मुख्मन्त्री नितीश कुमार होरें दरभंगा च कांग्रेस नेता राहुल गांधी मतदाता अधिकार जात्तरा दरान प्रधानमंत्री नरेंद्र मोदी हुंदे खिलाफ आपत्तिजनक भाषा दे इस्तेमाल दी निंदेआ कीती ऐ। इक सोशल मीडिया पोस्ट च कुमार होरें आखेआ जे कांग्रेस ते आरजेडी दे कार्यक्रम दे मंच पर प्रधानमंत्री हुंदे आस्तै गलत अल्फाज इस्तेमाल करना आपत्ति लायक ऐ। उनें आखेआ जे ओहू एहदी कड़ी निंदेआ करदे न। तोआई, बीजेपी ते इस मामले दे संदर्भ च दरभंगा च कई थाहरें पर पुलस गी शिकायत दर्ज कराई ऐ।

<><><><><><>

## Cloud-Bursts

उत्तराखंड दे रूद्रपयाग ते चमोली जिलें च बहल फट्टने करी बड़ा नुकसान होआ ऐ। राहत ते बचाव कम्में युद्ध स्तर पर चला'रदे न। स्हाड़े देहरादून संवाददाता नै जानकारी दिती ऐ जे चमोली दे देवक थाहर च 1 घर तबाह होई गेआ ऐ जेदे कन्नै 2 जनें दी मौत होई गई ऐ। दवे मरने आहलें दी लोथां बरामद करी लैतियां गेइयां न।

<><><><><><>

## National Sports Day

देश भरै च अज्ज राष्ट्री खेल दिवस मनाया जा'रदा ऐ। एह ध्याड़ा हर बरे 29 अगस्त गी हॉकी दे दिग्गज़ खडारी मेजर ध्यानचंद हुंदी जयंति पर मनाया जन्दा ऐ। इस बरे राष्ट्री खेल दिवस दा विशे ऐ- “शांतिपूर्ण ते समावेशी समाज को प्रोत्साहन देने के लिए खेल”। एह विषे इस गल्ल पर जोर दिंदा जे खेडुं रुकावटें गी हटाई सकदियां न- टीम बर्क गी बढ़ावा देई सकदे न ते क्षेत्र धर्म जां पृष्ठभूमि दे मतभेदें शा परे लोकें गी किट्टे आनी सकदियां न। इस आयोजन दे कन्नो-कन्नी “फिट इंडिया मिशन” 29 शा 31 अगस्त तगर त्रै-रोजा राष्ट्रव्यापी कार्यक्रम आयोजित करोग। “एक घंटा खेल के मैदान में” जनेह अभियान लोकें गी हर रोज घट्ट कोला घट्ट आउटडोर खेडुं ते शारीरिक गतिविधियें आस्तै समर्पित करने आस्तै प्रोत्साहित करगंन।

<><><><><><>

## India-Mondo Track

भारत नै राष्ट्री खेडू दिवस दे मौके अज्ज अपना पहला मोंडो ट्रैक हासल कीता ऐ। केंद्री युवा मामलें ते खेडू मंत्री मनसुख मांडविया होरें आखेआ जे मोंदी ट्रैक प्राप्त करने आहला भारत 25मां मुख्य बनी गेआ ऐ। उनें आखेआ जे नमें ट्रैक कन्नै भारती खडारिएं गी विश्व स्तर दी सुविधा हासल होंगन।

<><><><><><>

## Badminton

भारत दी बैडमिंटन स्टार पी.वी.सिंधू होर बीडब्ल्यूएफ विश्व चैंपियनशिप 2025 च क्वार्टरफाइनल मैच खेड्डने आस्तै तैयार न। उंदा मुकाबला इंडोनेशिया दी पुत्री कुसुमा वारदनी कन्नै एडिडास एरिना पैरिस च अज्ज शामी होग। एह्दे बाच सात्विक साइराज रंकी रेड्डी चिराग शेट्टी दी जोड़ी दा मुकाबला मलेशिया दी दुई वरीयता प्राप्त जोड़ी आरोन चिया ते सोह बूईयिक कन्नै मर्दे दे डबल्स क्वार्टरफाइनल च होग।

<><><><><><>

## Bangladesh

बंगलादेश च बरोध प्रदर्शन करा रदे इंजीनियरिंग दे छात्रें आखेआ ऐ जे उंदी हड़ताल सारे लोक ते निजी यूनिवर्सिटीज च अगली घोषणा तोड़ी जारी रौहग। इंजीनियर्स राइटर्स मूवमेंट दे प्रधान नै ढाका च कल इक प्रेस वार्ता च एह् दस्सेआ। बुधवारें ढाका च होठ दी झड़प्फ करी एह् बरोध प्रदर्शन जारी ऐ।

<><><><><><>

## Jitendra Udhampur

प्रधानमंत्री हुंदे दफ्तरै च केंद्री मंत्री डॉ. जितेंद्र सिंह होरें अज्ज उधमपुर जाइयै राश्ट्रीय जरनैली शिड्कै दे उधमपुर ते चनैनी मझाटै आहले हिस्से गी भारी बरखें कारण होए दे नुकसान दा जायजा लैता। दौरे दरान डॉ. जितेंद्र सिंह होरें पुर्नबहाली आहले कम्में दा बी आंकलन कीता ते मुतल्लका एजेंसिएं गी निर्देश दित्ते जे तौले गै मरम्मत आहले कम्में गी पूरा करन तां जे गड्डियें दी आओजाई गी बहाल कीता जाई सकै। उनें मकामी अधिकारिएं कन्नै बी गल्लबात कीती ते इस गल्लै पर जोर पाया जे इयै नेई स्थिति थमां निब्बड़ने आस्तै समें पर तैयारी करना मता जरूरी हुंदा ऐ।

<><><><><><>

## Stranded Pilgrims

श्री माता वैश्वो देवी जी दी जात्तरा गी मुअत्तल कीते जाने दी पच्छोकडै च कटड़ा च फसे दे शरदालुएं दी सखल्ली आओजाई यकीनी बनाने लेई प्रशासन नै ट्रांसपोर्ट सरबन्धी खास बंदोबस्त कीते न। रियासी दे ए.आर.टी.ओ नीरज शर्मा होरें दस्सेआ जे 200 शा मती बसें दा प्रबंध कीता गेआ ऐ तां जे कटड़ा च फसे दे शरदालुएं गी सुरक्षित उन्दे ठिकानें तोड़ी पुजाया जाई सकै। उनें आखेआ ऐ जे अह् कुंवारी च ल्हास-पस्सियां पौने ते खराब मौसम करी प्रभावित होए दे शरदालुएं गी ट्रांसपोर्ट, खुराक ते आसरमा उपलब्ध करोआने लेई प्रशासन

हर रोज 24 घंटें कम्म करा'रदा ऐ। शर्मा होरें इब्बी दस्सेआ जे बक्ख-बक्ख मैहकमें ते ट्रांसपोर्ट आपरेटरें बश्कार तालमेल स्थापित कीता गोआ ऐ तां जे हालात आम ध्याड़ें आह्ला लेखा होई जाने तगर शरदालुएं गी हर मुमकन स्हूलत दस्तयाब करोआई जाई सकै।

<><><><><><>

### Rail-Traffic

जम्मू-डिविजन च अज्ज लगातार चौथे दिन रेल यातायात ठप्प रेया- जेड़ा अगगे बी प्रभावित रौहग कीजे उत्तर रेलवे प्रशासन नै जम्मू औने जाने आहलियें 40 निर्धारित ट्रेने गी रद्द करी दित्ता ऐ। तोआई, उधमपुर ते रामबन जिलें च भारी बरखें मगरा कई थाहरें पर पेदी ल्हास-पस्सियें दे चलदे जम्मू-श्रीनगर राश्ट्री जरनैली शिड़क अज्ज उप्परोतली चौथे ध्याड़े बी गड्डियें दी आओजाई लेई बंद ऐ। मौसम दे खराब सूरतेहाल ते हाड़ें दे खतरे गी दिखदे होई जम्मू संभाग च सब्बनें सरकारी ते निजी स्कूलें गी कल 30 अगस्त तोड़ी बंद रखने दा हुक्म जारी कीता गेदा ऐ।

<><><><><><>

### Overall Situation

जम्मू-कश्मीर च बल्ले-बल्ले स्थिति हून सामान्य होआ रदी ऐ। हाड़ें करी प्रभावित केई सारे इलाकें च हून पानी दा स्तर घटी गोया ऐ। जरूरी सेवाएं जियां बिजली, पानी, शिड़क राबता ते मोबाईल नैटवर्क बी बल्ले-बल्ले बेहतर ढंगै सिर ब्हाल होआ करदे न। हालाके अजें बी केई सारे इलाकें बुरी चाली प्रभावित न जित्थे लगातार बरखें ते चानचक्क हाड़ करी ढांचे गी बड़ा मता नुक्सान पुज्जा ऐ। प्रशासन लगातार ते अनथक जतन करा'रदे ऐ तां जे लोकें गी बुनियादी स्हूलतां तौले थमा तौले हासल होन। लोकें गी अपील कीती गेई ऐ जे ओ चला रदे कम्म च सरकार दा सहयोग करन।

<><><><><><>